

Mario Melis, su presidente sardista

Non totus l'ischint, ma Mario Melis fiat ogiastrinu, nàschidu in Tortolì su 10 de mese de argiolas de su 1921. Fiat figiu de Giuseppe e de Michelina Corrias, ùrtimu nàschidu de una famiglia de oto frades.



Su giòvanu Mario at bìvidu sa pipiesa sua a Tortpli, posca in Baunei, in ue at frequentadu s'iscola elementare fintzas a sa de classe IV, e infines a Nùgoro, in ue sa famiglia si nche fiat cambiada a bìvere in su 1931. A minore de chimb'annos at bìvidu, mancari sena nd'àere cussientzia, su dramma familiare de s'arrestu de su frade mannu in Milano, Giovanni Battista, tando istudiante in su cabulogu lombardu, chi fiat istadu acusadu dae sa politzia de atividade soversiva antifascista paris cun àteros giòvanos libertàrios, tra issos su sardu Flavio Batzella, Lelio Basso e Giorgio La Malfa.

Custu fatu, fintzas si bìvidu in manera indireta, at a cunditziunare sa formatzione politica de su giòvanu Mario. Sa segunda gherra mundiale l'at bidu impinnadu in su fronte islovenu e infines in Sardigna. Est in custa occasione chi si nde fiat abigiadu de su bùidu politicu e de balores chi si cuaiat a palas de s'iscenografia de gherra ammaniada dae sa propaganda fascista.

A s'acabbu de sa segunda gherra mundiale s'at leadu sa làurea in Giurisprudèntzia in s'Universitàde de Casteddu, cumintzende fintzas sa carriera de abogadu. Incumentzat s'atividade sua comente dischente de s'abogadu Luigi Oggiano, chi pro isse at a èssere una ghia siat in sa professione, siat in campu politicu. In sa formatzione professionale e politica sua at tentu unu ruolu importante fintzas su periudu de imparu fatu cun s'abogadu Pietro Mastinu e cun su frade Titino.

Sighende sos rastos de sos carrales mannos, in su 1944 pigat parte a sa fundatzione noa de su Partidu Sardu, ghiadu dae s'idea cumbinta chi su pòpulu sardu aeret su deretu de si liberare dae cussa cunditziune de arretradesa a sa cale fiat istadu cundennadu dae sas politicas colonialistas de sos guvernos chi aiant guvernadu s'Ìsula. In su 1950 si cojuat cun Giuseppina Cuccu Pirisi (Nini); s'annu imbeniente naschet sa prima figia Michela, poi Antonio in su 1958 e Laura in su 1961. In su 1952 imbucat in su cunsighiu comunale de Uliana; in su 1956 at a èssere elìgidu sindigu, e poi torradu a cunfirmare in su 1960 fintzas a su 1964. Sighet sa càrriga de sindigu pro àteros bator annos (cun carichi interrutzione). In su 1959 benit elègidu Cunsigheru regionale e in su 1970 Presidente de sa Commissione Indùstria de su matessi Cunsighiu regionale. In su 1974 benit cufirmadu torra sindigu de Uliana. In su 1976, alleàntzia tra Partidu Sardu de Atzione e Partidu Comunista, benit elègidu senadore de sa Repùbblica Italiana. In su 1977, pro dessinnatzione de sa commissione, est istadu reladore in Senadu de su bilantzu de s'Istadu in sa Marina Mercantile. In su 1979 aiat lassadu su Senadu e benit torradu a elìgere Cunsigheru regionale. A pustis de pagu prus de un'annu benit mutidu a fàghere parte de sa Giunta presidida dae s'Onorèvole Rais comente Assessore a s'Ambiente. In su 1982 ruta sa Giunta Rais, benit elègidu Presidente de sa Regione, rinunziende però a s'incàrrigu pro sas dificultades in sa formatzione de sa Giunta. In su mese de maju de su 1983, pro detzisione de su Partidu, si fiat dimitidu dae su Cunsighiu regionale candidende•si a sa Càmera de sos Deputados, in ue est istadu elègidu cun paritzos votos. In su 1984 si torrat a candidare dae su Partidu a su Cunsighiu regionale e benit elègidu in unu cuntestu politicu favorèvole meda a sos sardistas: 12 cunsigheris elègidos a su postu de sos 3 de sa legislatura pretzedente. Elègidu dae sas fortzas làicas e de manca a sa càrriga de Presidente, at formadu sa Giunta cun assessores designados dae su Partidu Sardu e dae su Partidu Comunista, cun s'apògiu esternu de sotzialistas, sotzialdemocràticos e repubblicanos. In su 1987 sa Giunta si fiat dimìtida pro cunsentire s'allargamentu a sa partetzipatzione direta de duos assessores sotzialistas, unu sotzialdemocràticu e unu

repubblicanu.

Custa majoria at cunsentidu de guvernare sa Sardigna finas a su 1989, data de sa congruida naturale de sa legislatura. In sas votatziones noas est istadu elìghidu torra Cussigeri regionale e una chida a pustis Deputadu Europeu. In sas assembleas parlamentares at pronuntziadu paritzos interventos siat in àula, siat in Cummissione a Bruxelles. In Cunsigliu regionale at sutascritu cun sos collegas de su Grupu sardista importantes propostas de lege. In Istrasburgu est istadu designadu dae sa Cummissione Energia comente reladore de su tema: “Un ruolo del Comitato delle regioni nella politica della Comunità europea”. S’impinnu prus forte suo est istadu su de difùndere su messàgiu federalista comente forma moderna de organizatzione democràtica de su pòdere, e de sighire cun impinnu sos movimientos culturales, cumbintu chi su benidore de sa Sardigna diat àere apidu su puntu de fortza sua pròpiu in sa cultura. Mario Melis s’at a mòrrere su 1 de onniasantu de su 2003 a 82 annos.